

Tibbiyot sohasidagi vazifalar ijrosi ko'rib chiqildi



Prezident Shavkat Mirziyoyev raisligida 28-mart kuni sog'lqn ni saqlash sohasida belgilangan vazifalarni amalga oshirish chora-tadbirlari yuzasidan videoselektor yig'ilishi bo'lib o'tdi.

Ma'lumki, Davlatimiz rahbari 18-mart kuni tibbiyot xodimlari bilan ochiq muloqot o'tkazgan edi. Unda aytilgan muammo va takliflar bo'yicha 24-mart kuni Prezident farmoyishi qabul qilinib, yettita yo'nalishda vazifa va mas'ullar belgilandi.

Yig'ilishda shu borada boshlangan ishlar va oylik rejalar ko'rib chiqildi. Avvalo, aprel oyida 1 million nafar xavf guruhi ga kiruvchi aholi, 700 ming nafar bola va 100 ming nafar homilador ayollarni maqsadli skriningdan o'tkazish zarurligi qayd etildi.

Har bir oilaviy poliklinikada kunduzgi statsionar, 400 ta mahallada oilaviy shifokorlik punkti, olis hududlarda konteynerlardan 1 ming 700 ta tibbiyot punkti tashkil etishning ahamiyati ta'kidlab o'tildi.

Mahallabay tizimda ishlab, sifatli tibbiy xizmatlarni aholiga yaqinlashtirish, odamlarni sog'lom turmush tarziga o'rgatish asosiy vazifa qilib qo'yildi. To'g'ri ovqatlanish, jismoniy mashqlar, kasalliklar profilaktikasi bo'yicha qo'llanmalar ishlab chiqib, oilalarga tarqatish muhimligi qayd etildi.

Tez tibbiy yordam sifatini yaxshilash, olis hududlarda qo'shimcha brigadalar tuzish, bu tizimdagagi anesteziolog va reanimatologlar oylik ish haqiga ustama berish bo'yicha belgilangan vazifalar ijrosiga alohida e'tibor qaratildi.

Joriy yilda investitsiya dasturi doirasida tibbiyot muassasalarini qurish va ta'mirlash ishlariga budgetdan 1 trillion 200 milliard so'm ajratilgan. Mutasaddilarga qurilish ishlarini jadallashtirish, tibbiy asbob-uskunalariga texnik xizmat ko'rsatish tizimini yo'lga qo'yish bo'yicha topshiriqlar berildi.

Ochiq muloqotda respublika ixtisoslashgan tibbiyot markazlari yangi, yuqori texnologik davolash usullarini yo'lga qo'yishi zarurligi aytilgan edi. Misol uchun, har yili "oqqon" kasalligi bo'yicha 200 nafargacha bemor

ilik ko'chirish operatsiyasiga muhtoj. Gematologiya va qon quyish ilmiy-amaliy tibbiyat markazida zamonaviy sharoit yaratish orqali ushbu amaliyotni yo'lga qo'yish mumkinligi ta'kidlandi. Bunday ishlarni barcha tibbiyat markazlarida tashkil etish bo'yicha ko'rsatmalar berildi.

Davlat shifoxonalari va xususiy tibbiyat tashkilotlari uchun yagona tariflarni tasdiqlash, xususiy klinikalarda ham yo'llanma asosida tibbiy xizmat ko'rsatishni kengaytirish vazifasi belgilandi.

Yig'ilishda soha mutasaddilari, shifokorlar, hokimlar ochiq muloqotda belgilangan vazifalar ijrosi bo'yicha axborot berdi.





Manba